

CREOLE
CREOLE
KOGUI
KOGUI
YUCPA
YUCPA
WAYUNAÍKI
WAYUNAÍKI
ACHAGUA
ACHAGUA
ROMANI
ROMANI
BETE IRINAKA
BETE IRINAKA
LENGUA DE RAÍZ
LENGUA DE RAÍZ
TULE KICHWA
WOUNÁN U'WA
EMBERA HITNÚ CUIBA
TATUYO TINIGUA PIAROA SIKUANI
ÑENGATÚ GUAYABERO SIRIANO SÁLIBA
CARAPANA PUINAVE PIAPOCO
EDUÚRIA TARIANO CARIJONA KURRIPAKO
NAMTRIK WANANO TUYUCA KUBEÓ BARÁ
YANA CONA NASAYUWE DESANO PISAMIRA
INGA PIRATAPUYO YURUTÍ BARASANO
AWA PIT UITOTO TUKANO MAKUNA
CABIYARI COSEGUAJE KAMENTSA KAKUA YUHUP
COFÁN SIONA MIRÁÑA
TANIMUKA ANDOQUE
COCAMAMA NONUYA
MUINANE OCAINA
TIKUNA
BORA
YAGUA

KOGUI

Acuerdo Final para la Terminación del Conflicto Armado

Una publicación de
**La Oficina del Alto
Comisionado para la Paz**
y traducida por
MinCultura





KALDA NA GUBIELNU NA DULDA IZHGANSHIJI AGALDAÑKASHANE

Jeje kaltaki gubielnu na kalda na Kuba, Habanaxa sakí dulda izhgashiji agaldañgashatshake azhi izhgawashekilde shalda guaka. Ne, izhgawashekldauxa kalta gauwaldaki malde naldaka nakna, jaiki tezhuwa (6) agatsalda akaldak kágabak zúñkazauwaka guaka shalda za nuxa guaxaldixa. Kalda zhena gueni jatshiwa uguu kagi (50), zegatshake auxa kaxa izhgabeya guakna, gubielnu na dulda izhgashapana gueni maigua kagi (3) zegatshake kaxa izhgasaldiksha guakna, kaiga zhiniga mokue ekibeñga zek guazhaldiamake amagaba kualda, izhoxa, zana izhguiyakshapana ni guakaldi izhgawashekilde jiúñgulde.

ASKAXA 1

SENINULDAÑ AKLDE KUALDAMA KUTSHALDULDA AXALDEKSHEXAÑ

1. Aklde tezhi gakue ishkaldekshapana, guexañki abisajañ saldiña naldi te ishkaldekshapana nexalдиake gakue tuaki mikzexa, maldi makua saldiksha guexañ. Guakualiaga na nusa izhguana, kauksa, atsauñsha atsha jiaga saldi gualdixa nakna.
- Dulda izhgashiji súxake, mokue kágaba, zhaldi tezhi aldé gualdiniki zhe kakzek naldaki gakue ishkaldekshapana gualdiamak.
- Jaba Seninuldañ jiaga sha gua naldaki numañ izhgatuapan, guiyaba ikuagapan, izhgikualdapana guakualiade. Gakue jue akzeshi, azhi zhe akzeshi amaga guiyaxaldi nene atshazhaldixa. Guatshak guana katulda, zaldulda, jiaga numañ tuwa, guiyaba ikuaxa shi ishkaldiyapan guakualiada. Guakualiak zúñake kualdamak jiaga mokue aklde kutshaldulda negapano gualdixa, guatshak guana nasuñ zaja mokue ishkaldekshapana.
- Saldiña jaba Seninuldañ bakaldak zhekualdi guana kagubake zukuashi, duldazhikshiji, guiyaba guashi, zhiksaneshi, izhgauneshi nuxa zhekualdakualdixa.
- Saldiña naldi gakue auxaga zúñkaldegapana azhi ishkaldekshapana guakualiade, nashi, kuíbuldu agisaldi zhekuanaldixakue mokue jika kaxaldegapana. Gualdiamak na mielde kuíbulduki kaldaja agubisha sha guatone naldiade eñka azhi aikue na axañga agaunegapana guakue

**Acuerdo
de
Paz**



naldaldixa. Gualdiake jajiu niñkauwaki nuk agalduxa gualdiniki, egaba gakue niñkauwañki ishkäldekshapana, gualdiake kaxa aguañ aba guexañ.

I. Kagi sakí mixaldalda azhi numañ tuwa

Dulda izhgashiji iyajuizguatshake kagi axaldaldagaldekue naldiake agaxaunexaldixa anuñka mixaldalga nogakue janagatune pakualdalga nokshakue, akna 3 millón hectáreas janagatu guanaldixa na señgaba izhgaxau noshiñga ugu kagi (10) zexaldixa.

Jeki nekue kagi ekí akualdixa:

- 1) Multajañ kaldakuxanekue
- 2) Amagaba kagi abata nalgue yapana guananekue
- 3) Kalkalda nexaldixa abasha guananekue
- 4) Kagi muldetua numañ atuazha akuanekue
- 5) Kagi axautshitshi nalgue egaba yapana guanekue, kuibulduja, azhi mejañgaba eki guane.
- 6) Amagaba gubielnuk kagi agaxau azhi akiyagabe guanekue.


Kagi izhgajabiyexañ pldata migawasha gualdiake señgaba ilzabiyakue.

Anuñka nekueki kagi, kalta aji guaka agipakualdagaldekue naldiake, anuñka kugua (7) millón hectárea kalta yapañgualdixa.

Kagiki ezuañgaba gakue za mishkaldekshaldixa, te za mapakualshaldixa, nakna jiba atshiñdana akzekakuek zana, kagi axaldaldakue, azhi mielde kágabaki jue kagi axaldekue, munzhi sameya sigija mashanekue azhi ishuanekue, azhi mieldeki aji kagi zhnik aldeñsha guanekue, naldiake aikueja na kagi axaldaldakue.

Amak kagi axaldek gualdiake muldetua numañ izhgatuakue, zuzhishi, pldata ishkäldekshi, gualdiake jika ishkäldeksha jiaga shi kaxaldiyaldixa, eki gualdiake muldetua kagi kaldakuxa guasuñ jana se izhgaxaune ashekualdixa. Jiúñgulda se agaxauwi, se izhoxa, shi ishkaldiji, ni naldaki naldiake nizhi malde zaldi zhnik awaldashi, juwi janshagatse mikldoxa, jika aldekshane nabayasaji.

**Acuerdo
de
Paz**




Ekí zegatshake kagi muldetua numañ izhgatuwi, izhogapana, akna sakí atshaldixa muldetua se izhgauwi, mashi yo aguldañgashaldixa zhajanane naldiake eñka yo akuiyakshaldixa. Ekí guatogatshakna kualdama jiaga agisalsha naldaki numañ izhgatu nexaldiak guana ekí kaxa zegatuka jiaga aguañ abapana gualdixa nakldá. Gakue neksha naldiniki saldiñgak izhgaunek guakualdiamak, eki gualdiaga agubisha kaxa zegazhaka naklda. Akna gakue nexalda gualdiake muldetua numañ izhgatuakue naldaldixa nakldá.

Züzigexañ me jiaga kagi sha gua naldaki, jiba atsha guabaldiahuxa kaldi azhi tashima meñgua guagaba. Mitsabe jiba matshaldixa naldiake auxagaba jiba atshakue. Akna jiba atsha me jiaga guiyaba izhgikuagate nogakue naldaldixa nakldá.

II. Sakí ajanashaldixa jana izhgatune

Kaiga zhnik uguu kagi (10) zegatshake migisalda aguañ masha akualdixa, tezhi jiba za atshiji izhukakue jika kaxaldaldazhekue ne muañ gas nekueki jika aklde kaxaldexalda gualdixa. Guatshakna mieldeki nashi azhi mieldeki kabia atuwa naldasa guaka. Guatshaka na ezuañki sha agatse, azhi axautshi sana naheñki aklde azhi aguañ akze atuwa jiaga masha guakue naldaldixa. Guatshak züname saldiñga askimime kalde jana nuxa atuwi zhekualdakue, nusa jiaga izhguana, ni izhgapeñguu guagaba. Miya zhnik ekí kaxa zegatone naldazhe, nusa, izhguanapana, atsauñshapana, aklde akze naldakue izhguapana guaneñ zhnik

**Acuerdo
de
Paz**



ekí zek guaneñ zhnikna kaiga zhnikni ekí izhguana aguañ masha guakue naldaldixa nzha.

- Akna jiúñgulda aklde izhgakauwapan, gukse shizha naldazhaldi naldiake akuldeyapan, muldigaba shizha naldazhaldi naldiake aldi jiaga antena kagakte, ekíki malde zaldi zhekue jiaga ishkazakuashi ashekualdaldiamak. Ni jiaga naldazhaldi naldiake malde zaldi zhnik uldak ekiki saldiñgaja ni kaxaldaldiamak.
- Mielde kuibulduki kuelda axaldaldazhe, azhi mulbatatshi axaldaldazhe, azhi juwi janshagatse akse, azhi ni jiaga janshagatse tuagazhe naldiake aikue jiaga aklde kagaunegapan, guakue naldaldixa nzha.
- Guatshakna aklde gakue ishkaldekshapana gualdiak, ai jiaga kagaunegakue naldaldixa axajabiyaldiamak, ekíki agisaldi izhoshi guakuak. Akna muldetua sakí züzigakue kaksuñ naldiak muldetua züzixa shi kaxaldiya guakue naldaldixa.
- Eki gualdiakna aklde gakue jiaga negapan, guatshake saldiñga janshi akzeshiñgaba zhekualdaldixa naklda, guatshake agubisha kaxa naldaksa guaka nakldá.

III. Muldetua kualdama mixaldakuamak mizhogatshak guana zaja jiaga migakuahamak zakue

Kaiga zhnikni jai kaguba jana züñgatse zhe kaldogauxa agubisha migisaldapana, maldi makuapan, guakue zegakna muldetua zakue, ekí gukualdiak guana kalta nexa, jizha nexa jiaga aguañ abapana gualdixa naklda. Guatshakna zaja me jiaga muldetua zakuamak zalda guakualdiak mulbata jiaga aguañ aba gualdixa.

VI. Muldetua jiba ishkatzhakualdiak guana kuíbuldu jiaga akldé guildegapana gualdixa

Akna mielde kuibulduki akldak kaldaja agisaldatshatone, azhi gubielnua agaunegaki none, egaba jajiu nishi, azhi maldiguana, azhi niuba kuiji nuxa izhuka naldiake ekue jiaga kagik nauwa me kaxaldek gualdiniki jiba ajanashapana

**Acuerdo
de
Paz**



gualdiake jika migisalda, nusa izhguana, kauksha jiaga aguaña aba gualdixa, guatshak zūnake ezuañgaba izhguildegakualdixa za jañguakue ni zek. Akna kaiga zhnik ekiga zegazhaldiamake saldiña kuibuldu nauxa ji ajanashaldixa se ishkagaumalde azhi jana aktumalde nogakue zaldaldixa, ekiki ai guxa kagaxaunek gualdiamak.

MUKSHAXA 2

KALDA JIAGA KAUKSHA NALDAKI AKUIYAKSHA GUAKUE AKUAGAPANALDIXA GUBIELNUXA IZHOSHI

Kalda kaukshaksa gualdiamake kubita masha gualdiniki egaba gubielnuk nek gualdiniki exa zhnik sanegapanan atshaldiake saldiña Káguba sana jiaga guildegapanan gualdixa. Ekí atshapanan negapanan guakualdiake saldiña naldi mashi guildegakualdixa se ishkagau guakualdiniki amak akuiyakshapanan guakualdixa nakldá, gualdiak guana kauksha jiaga aguañ agaba gualdixa. Saldiñgak nusa izhguana naldaki zhekualdakualdixa zana ishkaldiyapanan guakualdixa ishkaldiyapanan guakualdiake izhguildek guakualdixa naklda.


I. Kalda jiaga kubita masha gualdiniki sañkalda nek atshakaga naldatshak aldeñ jañguamak sanegapanaldixa.

Kalda jiaga gubielnuk nek atshaldiamak axañ misha niuwi agaxegakue naldaldixa, amak agaxe gualdiake aldeñ jiaga sanegapanan atshaldixa. Guatshak amak negapanan gualdixakueki kaldajaña izhgakuxaldixa mieldeja ekí negate ajañgualdiake. Ai amak atshaldiamak gubielnujaña amak guiyaba agakauwakue agatsaldaldixa nakldá.

II. Kalda sañkalda nek gualdiniki sakí atshaldixa

Kauwizheñ jiaga ajañguxa ama kaxagatsek gualdiamake jeki atshakue: a) guiyaba izhgakauwakue b) kagisaldazhaldiamak d) ishkualdaldiamak e) agatualdixa.

**Acuerdo
de
Paz**



III. Kalda jiaga kuibuldu aksaneshi izhogapanaldixa

Kalda nakueja jiaga ezua se izhgaxau gualdini, kaldunasuñ ajanashaldiake kauwizheñ jiaga nakldunasuñ nizek akuaxaldiake ni meja atsasuñzamak ni matshi kakbeyazhaldixa.

Jigaba ajanashalda azhi guiyaba se agaxauwapana gualdiake saldiña juizhi zhajuizhaldek gualdini na, saldiña naldi atshakue naldaldixa, ni ezua agapeñgu guagapa. Ekí gualdiak guana zhuarduna naldi jeki nuxa agatsexaldixa tuwi akuak gualdiakna amak agatsegakue naldaldixa. Akna gubielnuja jiaga jigaba atshalda gualdiake saldiña zhe gualdini na, jekí agatsexaldixa nzha akualdixa.

Kalda nanekueja jiaga sakí ajañgualdiake kuíbulduldi abaldabiuk sakí ajañguxa dulda azaxaitshaldixa.

Kaiga zhiniki ezua aldabiu sakí zegatukagaba guaxaldixa gauwakue naldaldixa. Akna e jiba akbeya gualdixa jiaga shaxaldiyakue, ekí ejá guana sakí zegatuka muldetua kuibulduk dulda agaskaitshaldiamak. Guane ne eñki gubielnujañga na paldatak yo guakue agatsaldixa ekí zegatogauxa dulda zuxaitshaldiamak. Ekí gualdiak guana zek guazhamak azhi akuak guazhamak dulda akuazhaldiamak.

Izhgakuañnegakue, zhekualdakualdiamak, abetakualdiamak, izhgapeñgu naldaki

Ezua kunseju akzezhxaldixa nusa izhguana gakualdiake mokue zñezhgakuañnekshaldixa, ekí atsauñshalga noshi guanazuñnegak. Ekí aksezhek guanaldixa na kaxa zegapana gualdiake gubielnuja jiaga ai nak akbeyakue agatsaldaldixa, ekí zegapañkaki nauwateñgaba mokue izhgakuañneksha guwa guak gualdixa. Eki gualdiake agubisha kaxa zegazhaldixa nzha.

Kuíbulduga na zutualdixa izhgakue

**Acuerdo
de
Paz**



Gubielnuja kaiga zhiniki kuíbuldu na aklde kama gukshakue agatsaldixa, gaunexalda gualdiake kuibulduja na tuake ji atshaldixa guak guanaldixa amak atshaldiamak. Akze ekí naldakiki atshuake ji atshaldixa guak guanaldixa amak atshazha guaxa shalda na kaiga zhinik ekí zegazhaldiamak jeki se akldeyaldixa nzha.

Zhiksanexa aklde kama guxaldiamake akldeñga se izhgauwakue zaldaldixa nakldá.

Kaiga zhiniki ji ajanashaldixa akuashi se agaxau gualdiake saldiña naldi yo atshakue zúñgatsaldixa. Ekí atshakualdiak guana jika agatsexaldixa akuak guanaldixa amak agatsepana gualdixa naldasha. Akze, ekí atshaki naldakualdiake jika ajanshaldixa akuak guanaldixa amak agatsegazha guatshak guana kaxa muna guxa, naheñna ekí zexalga nogazhaldiamak ekí atshakue naldaldixa nzha.

IV. Sánkaldakueja ji ajanashapanaldixa akuaxaldiake ajanasha gualdiahuxa me nuxa guagakue.

Zhiksanexalda guakualdiake zhualduxagaba zúñze shaklda izhguana xaldekna na sanegakue zaldaldixa.

Mieldeki sañkalda nexaldixa itshanalda gualdiake axañ misha kuibulduja sakí jañguatuka muldetua aklduka xaldek, gualdini ai zhinikna sakí makaunexaldixa, se agauwakue. Akna kaiga zhiniki izuka naldaki, mañgaba itshana sagatsaldi masanexaldixa janaktu guakue naldaldazhaldixa. Ekí gualdiak zúñake aik zana aklde nashitshi padata aklde jiba akbeyakue naldixa nzha.

**Acuerdo
de
Paz**



Sañkalda nexaldixa ishkakuxalda gualdiake izhupa duldasha atshagalde na izhgakugakue naldaldixa

Kaiga zhiniki sanexaldixakue ishkakuxalda gualdiake aklde zhikzhena xaldek izhgakuxakue. Akna nashikue, kuibuldukue ekí atshaldiamak akldeñga sedulda kagakauwakue naldadixa. Gualdiake tezhi, nitshi zaldi izhukakueja jiaga sañkalda senexaldikue ishkakuxalda gualdiake kauwizheñ jiaga muldetua sanegaka ishkakuxaldiamak.

Sáñkalda nexaldixa ishkakuxaldixa se agauxa yushakue naldaldixa.

Mielde sáñkalda nexaldixa izhgakugakualdiamak se aguxakueja kaiga zhiniga mozeñ ajanashiji aldagatonamak, mielde aklde akldeki aklde paldata agakue naldaldiake aiki aldeñga ajabi atshixa. Ekí zegeñ zhinik na ekí zegazhaldiamak agatsaldi se agau guakue naldaldixa.


Sanexaldixakue juezha gualdiamak agatsaldi duldashakue

Sanexaldixakue iyazhaxalda guakualdiake muldetua zauwa gualdiamak agatsaldi tu xaldek izhagakue. Akna sanexaldixakue muldetua axañ misha shaxaldiya aksanek xaldek izhagakue. Tuagaba ite makualdinik malde zegatshake muldetua atshaki naldaldiake eñki axaldaña migatse na ekí zhe nuxa izhoxaldixa. Akna kaiga zhiniki munzhi jiaga sañkalda negaka itshana gualdiake e jiaga aklde janshibe naldaldixa nzha.

Señgaba zhe nogakue guaxaldixa shaldagaba sáñkalda yaldaxaldixa

Kalda zhena guñgueni agubisha kaxa zegatone, guatshakna anuňka kuibulduki agisaldi, zhekuanekue nakna. Kaldaja kubita masha gualdiake ubaňga ugu kasa tezhuwa (16) mozhua kagi, sáñkalde yaldaxaldixa, ekuejañki ezuañgaba kaldaja ekí agisalshatone jiúñgulde za aklde guaxaldixa.

**Acuerdo
de
Paz**



MAIKAXA 3

SAKI KAXA ASALDIKSHANE

DULDA ZHGASHIJI SUXAKE KALDA NA SULDAU AXAUKSHA GUAZHALDIXA IZHGWASHEKLDE (KUBITA ABASHALDIAMAK)

Kaxa saldi gualdiamake kaldaja aklde sulda, kuíbuldu sha guazhaldixa guak, guñkuake suldauja jiaga aklde kaugakshazhaldixa, kubita mashapana gualdiamak. Akzé, kubita mashagabaki kaukshalga noxaldiake suldau ama tu guazhaldixa. Akna kaldaja ekí guak; kaiga zhiniga aklde sha atshapana guañkaldaldixa nzha. Amak sha atshaki naldaldiake ni meja sha guazhaldixa, ekíki mozhua kakldek naldaki kubita abajapana gualdiamak. E abaja gualdiniki mokue kuíbulduk nak gualdiniki janshizhe nek zhekualdapana gualdiamak.

Kaldaja kubita mashalda gualdiake uniñkauwa zalda ONU, tuate noxaldixa, eja na kubita masha gualdiake nuk ipana gualdiniki, zhiktiñgua azhi zukua gualdiniki jikagaba saldiñgaja tualdiamak gauwa akte gualdixa.

Kalda suldau na kaukshaksa gualdiniki, kubita abashaldieňka neyapanakue kagatsaldaldixa, ekí ajanashaldieňki 22 ulduň jana kaxagatune noxaldieňka amak aldeyaldixa. Exa alde gualdiake axaň misha kubita abasha gualdiniki sakí ajanashaldixa axaň misha muldetua shi kaxaldixa. Ekí auxa kagabeya gualdiake zhnikna mokue kuibulduldi aldeyapana gualdixa nzha.

Kalda amak atshaldiamak kugua (7) agatsalda atshakue agatsaldixa izhgawashekde, akna amak zexaldiamake 25 guiyaba siyakldene. Akna amak zexaldiamak muldetua jana axagatune.

**Acuerdo
de
Paz**



I. Ji shalda

Muldetua ajanashaldiahuxa niuwi izhgawatine 180 Idiuwi ajanashaldixa. Anuñka zegatshake nuk kubita abasha gualdiniki amak ajanañga guakue naldaldixa. Amak zexaldiamak saldiñga se agaxaunegaba nogakue naldaldixa, mashi, me na, ji axaldixa, ji juezhaldixa. Akna saldiñga gubielnua jiaga yo guakue agatsaldixa, akna kagisaldi guakuak suldauja numañ katuakue zaldaldixa nzha.

II. Kaukshaksa, gualdiniki kubita mashapanaldixa

Maigua ugu jatshiwa (35) agatsalda, mielde atsha guase akuaklde naldiake amak atshakue naldixa. Akna e abashatoxaldieñka kaldakue azhi suldaukue jiaga mokue kaxa zhikbeya gunana atshakue kagatsaldazhaldixa. Sakí nuxa atshakue izhgawasheklde naldiake auxabe atshakue naldaldixa.

III. Ajanashauxa atuate noxaldixa

Amak zexaldiamake (gubielu, ONU, kalda) maigua naldi na muldetua atuate nogakue kagatsaldixa, amak zexaldiamak. Kaldaja suldau kaugaksha guazhaldixa, kubita mashatoxaldieñ. Mokue axañga zegatonamakga kaxa zeshi guakuak. Uniñkauwa zaldakueja zunake, kubita abashalda gualdiake tuate nogakue agatsaldixa. Amak ajanashatogatshak kuibulduk akyo zaldaldiake ekue jiaga akiyasalsha guakue naldazhaldaldixa. Guatshake suldau zunake sha ajanashiji guakuak jejie kagi agatsauxa nashi numañ tuwiñga zhekualdakue agatsaldixa nzha.

IV. Kagike jiaja numañ tuakue zaldaldixa

Kaldakue mani zhekualdini mashi kubita abashaldieñka aldeyaldiamak kagisalsha guakue naldazhaldixa. Akna suldauja jiaga tuate nogakue zaldaldixa. Gualdini eñka alde gualdini 180 Idiuwi ashe noxaldiake tuate nogakue zaldaldixa kagisaldi guakuak.

**Acuerdo
de
Paz**



V. Numañ tuakue

Kalda suldau kaukshaksa guatshak z̄unake gubielnuja, uniñkauwa zaldakueja, kaldakueja jiaga numañ tuate nogakue katsaldaldixa. Guakna suldauja jiaga kagisaldi guakuak. Akna kaldakue aldeyaldar gualdiak numañ tuate, gakue kakualdaxalda gualdiak numañ katuate, kubita juldrukshagaba azhi jigaba sha makuakue naldiak juldrukshagaba.

VI. Meja amak ajanashaldieñki se agauwaldixa

Kaldaja kubita mashaldieñka ji juezha gualdiahuxa jana axagatune nogakue zaldaldixa. Ekíki kagisaldi ashekualdazhaldiamak auxaga akuxaldiahuxabe se kaxaune nogakue (gubielnuja, sañkalda akyo izhukakue na ekí yo atshakue naldixa)

VII. Kubita abashaldixa

Kaldaja kubita mashapanatshak muldetua tuate nogakue zaldaldixa, kubita sha makuakue abasha gualdiak, atushegasñ megakue, numañ tuakue, ai abashixakue jiaga muldetua tuakue, namak giemi kubita kaldak agekuane azhi axautshi nuxa. Ekí nakna kaldaja kubita mashalda gualdiak ONU, eja agatuakue naldaldixa, gualdini ejañga na agipanakue. Gualdini ejañga sakí guakue tualdiak amak gualdixa. Gualdini aldiweki kalda saldiñgak ekí akbeyaldixa, kaiga z̄unake nuk kubita masha ni gaku guagakue katsaldixa. Ekí zegatshak z̄unake kalda kubita agekue nane ne agekualdaksa gualdiniki kuíbulduk zhekualdalda gualdixa.

**Acuerdo
de
Paz**



KALDAJA KUBITA MASHA GUALDINIKI SAKÍ IZHOXALDIXA, SAKÍ SANEGAPANALDIXA, JI GUAGAPANALDIXA

Kalda kubita mokue kuíbulduk nak, mashi gaja ikue naldiake eñka nak gualdiake ubañ meñki kama guxa gualdiamak nauwa agaunegakue zaldaldixa. Guatshak kauwizheñ jiaga kubita abasha gualdiniki jiba ishkatsapana, kuibulduk zaldakue na ishkabaldegapana, axaunegapana sha atsha naldaki. Sha guanekue jiaga mokue ekiga atshañkaldixa nzha neshi abizapania. Mielde kuíbulduki agubisha akiyasalshane naldiake eñki aiki aklde agaunegakue akuagapana, gui na gakue aklde eñka nekshapana aklde jiañ izhoxa zana zhiksanepana guakue naldaldixa nzha.


Kaltakueja amak kubita abasha gualdiake sakí za kakua nogazhaldixa, kalda nane jiaga sakí nuxa izhogakue akldexaldiak amak nuxa atshiji izhogakue. Mokue axañ atshiji izhonamakga zunake atshakue naldazhaldixa.

Munzhi kalda nane naldiake aiki egaba tuakue naldazhaldixa, ai jiaga munzhi naldaldiniki amaga nuxa tuakue naldixa, agisalsha naldaki.

Nakuakue, gayakue nuxa kalda nekldekue mokue akzuxaita guane nanaldixakue zunake sakí sukua numañ tuakue guiyaba kue naldaldiak amak nuxa tuapana guakue zaldaldixa. Akna sukua zunake sha gua naldaki egaba guiyaba migisa guanetshi 1448/2011 zalgueñka sezhek guaneja guagamak nuxa ekue zunake naldaldixa nzha. Akna ekueki nak gualdiake mokue jiak kauwijaba nugeñka, azhi kauwikue na mokue zhikldabigakue nuxa kagatsaldixa. Gualdinik zhnik na sakí atshaldixa naldiake amak ne guildexaldiamak egaba agaunegakue naldaldixa nzha.

Kalda nanekue mokue aldak gualdiniki egaba sáñkalda nexa sanegakue niñkauwañki aldiyapana gualdixa. Axañki kubita kaxañ naldi sakí agatsegaka atuñka nane ne kaigaki, muldigabak na sakí ajañguatuka akuashi abizhatoxaldixa.

**Acuerdo
de
Paz**




Akna ekue jiaga guiyaba sezhegatogeñka yate akualdini kauwizheñ jiaga guiyaba axauwi nashi iyakuali di ashekualdapanaldixa nzha. Ekí gualdiake gubielnuja jiaga nauwa yo kakuakue naldaldixa ajañguxa muldetua kagakuldek gualdiamak. Akna eñki 19 de julio 2026 zhnik amak zegapanaldixa, 19 de julio de 2022 zegatshake ji akuaxaldixa sakí asanexaldixa muldetua se agaxau guane nogakue naldixa.

Kaldaja kubita masha, kaxa, kaukshaksa gualdiniki gubielnu na sakí dulda izhgashiji izhgawashek guane naldiake auxabe atshiji izhoxaldixa. Akna kubita masha guanekueki jiba ajanshapana, jika aldekshapana gualdiamake gubielnujaña nauwa yo guakue naldaldixa.

Akna dulda izhgashiji izhgawashekde kalta yasuñgua gualdiake ubaña, kubita agekue nakueki agaunek gualdixa misha sheña se agau guakue naldaldixa nzha. Ai jaldekue izhoxaldixa 2 kalda nane, 2 gubielnu ekueja jalde se aklde guane naldiake numañ tuwi izhoxaldixa nzha. Ekueja na sakí azhi ji ajanashaldixa se agauxa izhoxaldixa, ekiki kalda nanekue mokue kalda nek, azhi sha atshapana gualdiak tuatoxaldixa.

Kalda nanekue kubita abasha gualdiake jeki kagaxaunexaldixa; gubielnuja kagaunexaldixa nak axañ misha mitsa kubita abashane azaitakue naldaldixa, mitsa naldiake ekueki gakue ishkaldeshapanaldiamak kagaunegakue, katulda numañ tuwa kaxaldegakue, miyagaba sha makuakue aldixane naldaldiak ai niji yo atshaldixakue. Ekí ajanashatogatshak mozhu kagi (2) gubielnuja kagaunegakue naldixa, nauwa zhawa paldatak naldi kakzabiyate nogakue naldaldixa. Exa zhnik mulbatashik, shitiyak, juwik saldiña amagaba kagaunegakue naldaldixa nzha.

**Acuerdo
de
Paz**



SAKÍ YO AJANASHALDIXA ANUÑKA SHANEKUE ABA GUANALDIXA SHA ZŪNAKUAZHALDIAMAK


Duldda izhgashiji asúxake ekí izhgawashelde anuñka shanekue aba guxakue sha ajanshapano gualdiaké kauwizheñ jiaga nauwa yo ajanshaldixa, kuíbuldu agisaldi gukuak. Akna saldiñga naldi muldetua numañ atuate nogakualdiaké sakígaba zúñgisaldapana gualdiaké uniñkauwa zaldakue sha akuase guakakuek jiaga akbeyakue zaldaldixa. Akna kalda jiaga ekí zegazhaldiamak muldetua nashi ikualdi, aksaneshi nuxa zhekualdakue guashi izhoxaldixa. Kubita masha gualdi jiak mokue sha atshapano guazhaldixa guaklde nakna amak atshakue naldaldixa.

Kaldaja kubita masha guatshak jiaga anuñkaki amaga sha ajanashoxaldixa, jajiu nabesakue, akte akte nanekue, sizixa abaksukue matshui ekí ajanashalga noxaldixa. Ekí zexldiaké agubisha ekí zegazhaldiamak zana aklde niji nuxa zhekualdakue naldaldixa. Ekí guakualdiaké mokue aklde kaxa zegapana guazhaldixa, sakí dulda zhiksha akuane e zana aklde axazguapana guakue naldaldixa.

Akna gubienuja zúnekua gualdixa ezua se agau atshakue naldaldixa, ekí mieldegaba zegapana gualdiaké zúnekua akzek gualdixa. Mielde kubita ibikueki aklde aklde guildegazhaldiamak saldiksha gualdixa.

Akna suldau, puldesia ekuega na aklde kama gukshakue naldaldixa, shanekue mokue aklde iltegapana gui guakuak. Akze ekí guaki naldiaké jiak mokue aklde sha atshixa niñkauwañki negapana guaka nakna ezuañgabaki ekueki aguañ masha guakue naldaldixa nzha.

Kalta jiaga kubita masha gualdiniki egaba saneshi neyalda gualdiaké ekue jiaga ekiga numañ katuakue naldaldixa akze numañ tuaki naldaldiaké ekue miñgaki kagisaldapana gualdiaké, gubienujañga na ikualdakue, numañ tuakue zaldaldixa. Ekigaba zhekualdapano guakualdiaké agubisha kaxa zana zek nozhaldixa naklda, akna kaiga zhiniki saldiñga numañ atuwi zhekualdakue zaldaldixa nzha.



MAXEÑKAXA 4

JAJIU SHALDAKI SAKÍ SE IZHGXAUÑE

Gubielnu na kalda na dulda izhgashiji zuxake, ekí nuxa izhgawashek, nasuñ jiaga jajiú kaldekshixa, nabakesa, nalguak ekí kaxa zegatone nakna kubita masha guakualdiniki eñki nixal guaxaldazuñsa ni nabesaldazuñsa gualdixa. Kaldaja tuatshak jiaga ai zhnik nuxa ekí kaxa zegatone nakna kaiga zhniku nuk aklduxal guak nexaldixa.

Gualdiake gubielnuja jiaga mieldekueki jajiú nekshalga noxaldiake aikue jiaga nigase aklde akbeyapna guakue naldaldixa. Akze, ekí guaki naldiake anuñka nekueki ekí atshalga noxaldiake malde me kaxa saldi guazhaldixa. Akna saliñgak kaiga zhniku jajiú nixa, nabesa guase guapanakue naldaldixa.

Ekí gualdinik na kuibulduk zhekue jiaga nakuakue, gayakue jajiú gaxakue ekue jiaga kagaunegapana gakue, ekí ajanashaksa gualdiamak. Akze guaki naldakualdiake amaga zek gualdiak zunake malde me kaxa saldi guazhaldixa.

I. Jajiú neksha shalda kaxa

Jajiú nikakueja nuk akldugakue, akldañgashakue naldaldixa. Gualdiniki egaba kualdama zana aklde ishkaldekshapana. Akna gubielnuja jiaga jajiú nigase aklde guashi izhogakue agatsaldixa. Akna mieldekuejañki jajiú nixalga noxaldiake aikueki ubañga kagaunegapanakue, e zana aldeksha nogazhaldiamak. Akna kagabatshi kagildi, azhi mani malde zaldiñga mokue ega aklde aldekshapana gualdiake ubañga gubielnuja tuakue agatsaldaldixa. Ekibeñga na kaldaja maniñgaba sha makuakue kagi ishane naldiake ai nuk guxal guak guakue agatsaldixa.

**Acuerdo
de
Paz**



II. Jajiú gaja

Nakuakue, gayakue azhi mieldegaba jajiú zaxakue naldiake ekí zexalga nogazhaldiamak agatsaldi saneshi izhogakue zaldaldixa. Akna mielde jajiú zaxa naldiake egaba atualdieñ ezua se axagau guanaldixa ekí atshalda gualdiake eñ uldak xaldeki agaunek nogatshake aguañ aba gualdixa naklda. Akze ekí atshaki naldakualdiake ni ezua izhgaunek zegazhaldixa.

III. Jajiú neksha azhi nabesaja

Jajiu naldaksa guexañki e nikakue, e nabesakue, e jabixakue kalgugakue naldaldixa, akze ekí guaki naldakualdiak sakí aguañ abaldixa.

Akna kaiga zhiniki mielde jajiú, nekshixakue naldiake aguañ mashalga nogakue zaldaldixa. Ekí atshixakue guxa xaldeki ekueki juaxaldiya ite guakuega naldaldixa. Akna, kuíbuldu nauxa izukate nogakue, mieldeki ekí atshalda gualdiake ai na ekí zegapañ guaxalga nogakue naldaldixa. Ai zhiniga guana anuñka ne sáñkaldakue jiaga kobia negapana, guxa shalda tual nogakue. Ekí zeka aguañ aba guexañ zunake uniñkauwa zaldakue juizhi jiaga matshui dulda zhikshakue nakzá.

**Acuerdo
de
Paz**



JATSHIKAXA 5

AKIGIYALSHA GUANE SHALDAKI SAKI IZHGAWASHEKLDE NAMAK GUAGAKUE, GUIYABA SAKÍ AGAKUALDALDIXA, ILZABIYAKUE MOKUE AJANASHAZHALDIXA

I. Mieldekue na naldi amak akldexaldixa

Akiyasalsha guanekue axakuañnek akualdiamake guiyaba migatse azhi migatsaldazhe tuñkakue naña na amak jeki atshakue naldaldixa:

- o Agisa guanekue ne namak nzha akldeksha guakue naldaldixa
- o Sakí zhnik akuaxa, guane naldiake muldetua guagakue naldaldixa
- o Gualdiake agatse tuñkakue jiaga aiga izhogakue kagatse
- o Izhgakuañnegakue, gualdiniki mokue ekíga atshazhaldikue nzha axeldagakue.

Saldiña naldi, zekldamak nzha guaxaldikueja jiaga nukate nogkaue.

Agatse guakajañki ekí atsha guaneñki jeki agatsaldixa tiwi guak gualdiake amak nukakue naldaldixa. Gualdiniki mokue ekíga atshazhaldikue nzha nexaldiake namak ni maldek jañguakue.

Akiyasalsha guaneja jiaga ai amak atshanane jekí agatsaldixa nzha, akuaxaldiake aldeñ jiaga nukate nogakue naldaldixa. Ekíki malde zegatshake agabeyazha guane nzha neshi guakuak.

II. Amak aldexaldiniki sakí ajanashaldixa

1. Atshanamak juezguakue agatsaldaldixa, namak guakakue, mokue ekiga atshazhaldixa axeldagakue.

Sakí zhnik akuaxa guane naldiake aitshi akajakueki jeki zhnik na ekí guañkalde nzha, muldetua namak akbeyakue kagatsaldaldixa. Gualdiniki mokue ekí makuapano guazhaldikue nzha negakue naldaldixa.

- o Akna jinak ekí akuane naldiake jeki zhnik guañkalde nzha guagakue

**Acuerdo
de
Paz**



o Mieldeja ekí gual guaklde naldiake, aldeja jekí zhinik ekí guane nzha guakue naldaldixa. Ekíki saldiñgaja akualdi noxaldiamak.

o Gualdiniki mokue ekí zukua naldaki ashekualdaldixa axeldagakue.

2. Yatshuaksha guanekue mashi kagi yashane naldiake eñka niyakue.

Akuaxa gualdiniki maniñga yatshuaksha akuanekue amak akuaneñka akajakuek, agatse azhi agatsaldazhe tuñkakue jiaga tuñshakue. Ega kasa izhgauwi ekí atshakue naldazhaldixa. Egaba akajakueja tualdiamak, akualdaldiamak.

3. Namak aldexaldiakе mitsabe katuakue naldaldixa

Namak muldetua atshanauxabe alduna izhguak gualdiake eñki mitsabe agatse tuakue akuaklde naldiake aiki auxabe tuakue naldaldixa.

Akze, kaldakue jiaga kaxabetakue naldatshak, agatsaldaki nalgue jiaga akuaxa, akuteshek awalde, guiyaba zana atuñsha noshi akuaxa, kamal naldi akuxa awalde akuaxa, akldegaki muzhi jiaga izhoxaldieñki nak gualdiniki saldi gai yasa guane naldiak zùnake sakí guiyaba guaka naldiake amaga kagatsaldixa nzha.


Akna kalda mieldeki akaldak sha atshane naldiake e zùnake 5 azhi 8 kagi juaxaldikue izhogakue naldaldixa. Naldatshak namak atshanauxabe guakue agatsaldaldixa.

Akze mielde kaldakueki namak negaki naldiake ekue zùnake 15 azhi 20 kagi juaxaldikuekue izhogakue agatsaldixa nzha. Matshui sha atsha guane naldiak zùnake guiyaba tuakueja naldaldixa.

4. Mokue atshazhaldikue nzha nexaldiniki kaxa niya naldaki izhoa

Kaxa saldi gualdiamake mokue atsha guazhaldixa guak gualdiniki guakldauxabe izhogakue agatsaldixa. Akna aldeñ jiaga ekiga zegazhaldiamak guashi izhogakue agatsaldaldixa. Ekí nakna mieldeki malde guaxa agisalsha guane naldiake aiki agakuañnegakue, mokue ekiga atshazhaldikue nzha negakue.

**Acuerdo
de
Paz**



5. Mokue atshazhaldikue nzha

Mokue ekiga sha atsha guazhaldixa axelte guxakue z̄unake kauwihezuañgaba ekí negakue naldazhaldixa. Agatse azhi agatsaldazhe tuñkakue juizhi na ekí negakue agatsaldixa nzha. Ekí nek gualdiniki kuíbulduk jiañ izhogakue agatse.

6. Sha atshase shalda guashi izhoxaldixa

Gubielnuja jiaga mokue ekíga kaxa zek guazhaldiamake saldiñga jai zhe kaldogauxa nusa izhguana naldaki zhekualdakue z̄uñgatsé. Akna nauwiji kuíbulduldi kaxa zek guazhaldiamak zhiksaneshi izhgauneshi izhogakue naldaldixa. Akzé, ekí atshaki naldakualdiake mokue ekíga kaxa zek gui guakuakna ekí izhogakue. Akna kaldaja jiaga ekí guakde kaiga zhiniga mokue ekiga atshañkaldaldixa nzha.

**Acuerdo
de
Paz**



TESHKAXA 6

AMAK ZEXALDIAMAK MEJA TUALDIXA

Dulda izhgashiji izhgawashek guanamak zexaldiamake, akuakldauxame tuate nogatshakna amak zek gualdiake:

I. Amak zexaldiamak agatataue nogakue

Kaldaja kubita masha gualdinik jiaga amak zexaldiamak egaba tualdixa ezua se agau guakue naldaldixa, aiki Bogotaxa noxaldixa. Aiki maigua (3) gubielnu na (3) kalda nanekue na.

Gualdini ekuejañki ezuañgaba jeki atshaldixakue: (1) nusa izhguanalda gualdiake mokue dulda zhikshisha gualdixa (2) dulda izhgashanauxabe ajanashiji ashekualdaldiamak (3) ekueja maniñgaba ji guagakue naldaldiaké ekueja guashi neyatoxaldixa, nashikueja jiaga akuali zhekualdiamak.

II. Sakí atshaldixa

Dulda izhgashatogueña mielde ajanashaldixa izhgawashek guane naldiake auxabeña jañgui izhogakue zaldaldixa. Akuak guazhanamak akuagapana azhi ajanashapana guakue naldazhaldixa. Akna mitsabe dulda izhgasha guane nake auxabe za ajanashaña ugu kagi (10) zexaldixa, guatshakna akuakldauxa, dulda izhgashanauxa nuk asaldikshakue naldaldixa nzha.

Kuatshakna palda jiaga CONPES, zhnik amak zexaldiamak yakuxaldixa akuaklde nakna amak ajanashiji zhekualdakue kagatsaldixa.

Makaiwa kagi zegauxa (4) abisa sáñkalda yaldagatshake kauwizheñ jiaga sakí atshakue ajañguxa akuaxaldiaké kaldukaña guakue kakldexaldixa. Akna jeié kagi agatsauxa mitsabe nuxa paldata jiba akbeyakue gubielnuja guak gualdiake amak atshakue agatsaldixa itshuaksha naldaki. Guatshakna azhi guiyaba jiaga miyaki nauwa yusha guakue naldiake kalda nanekueja jiaga nauwa atuateña alodoxaldixa, kauwizheñ kaksuña ekí zegakue naldazhaldixa.

**Acuerdo
de
Paz**



III. Zhigawakshekldauxa me zexaldiamake mieldekueja yo guakue

Saldiñga municipio, departamento nahauxa jiaga gubielnuja nashikuetshi, kuíbuldukuetshi sakí jiba agabeyaldixa akuaklde naldiake amak zegakue naldaldixa. SGP1 azhi SGR2, alcaldekueja amak padata jiba akbeyakue naldaldixa.

- 1 Sistema General de Participación (gubielnuja kalda uzgauwane kuíbuldukuetshi)
- 2 Sistema General de Regalias (Jika nekshixakueja ilzabine guanekue municipio padata kue)

IV. Axautshikue jiaga agatuakue

Dulda izhgashanamak zexaldiamake jika nekshixakue jiaga izhgawashék guanahuxa me atshiji ashekualdakue. Ekí gualdiakna izhgabenamak agatsexalga noxaldixa naklda, gualdiake padata kuíbulduk axazauwa gualdixa awazakauwa guanaldixa agubisha itshuanaksa gualdixa nakldá.

Jeki nuxa na gubielnu na kalda na dulda izhgashiji yajuizgua guane. Akna saxa (2) octubre 2016 zegatshake, saldiñga jai kagi agatsauxa, ekí guagakue zúñgatsaldixa (namak zha) azhi (naldagalde nzha) guagakue naldixa nzha.

**Acuerdo
de
Paz**